



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8



Myanmar junta tekolakba regional summit ka nung adentsüi

Celtic goalkeeper Schmeichel hopta 6 masayatettsü



VOL. XXII ISSUE NO. 169 (ADOK 169) DIMAPUR YANGTEPNÜ THURSDAY RONGCHII (APRIL) 03, 2025 ₹ 5.00

Ukhrul nung Naga nungeri lungkak ait

Imphal, April 2, 2025 (Agencies): Manipur kübok Ukhrul district headquarters nung Free Movement Regime (FMR) agienba aser Indo-Myanmar arrtsü atsüdangba anema lungkak aitba sentong ayonga agiogo.

Iba sentong nung Phungyar MLA Leishiyo Keishing, Chingai MLA Khashim Vashum aser Ukhrul MLA Ramnganing Muivah nunger den Naga lennir aikati shilem agia liasü.

1940s nung British nunger yimsüsürtemi arrtsü ladangtsüba aitsür aser iba ajanga Naga maitsü aser telongjem raksatsür ta lungkak aitertemi ashi.

Centre sorkari "Divide and Rule" tangatetba nung inyaksangshir aser ibala policy tem ajanga küm aika Naga nunger timtemdakja arur ta parnokisa ashi.

Lungkak aitertemi Ukhrul Districtm nung Deputy Commissioner ajanga Prime Minister Narendra Modi dangi memorandum ka yok.

Iba memorandum nung akhi ama Free Movement Regime (FMR) tenzüksü aser Indo-Myanmar arrtsü atsüdangba anentsü shia lir.

Iba memorandum ya Tangkhul Naga nunger tenüng nung agütsüogo.

Kohima nung ki pezü rongdok

Kohima, April 2, 2025 (TYO): Tanü anüngdang 12:00 ako meta Officer's Hill Colony, Kohima nung kitsükkirong lendong ka atalokdang ki pezü mitsü kuma rongdokogo.

Iba lendong ya electric short circuit ajanga adok asütsü akok ta temulung melemi bilemer aser kibong 7 talidak maka kümogo.

Mi adoka arongdang LPG cylinder pezü tashi apokba ajanga mi tuluba aküm saka fire tenders ana den firefighters aser colony nung alirtemi mi enseptet.

Iba lendong nung nisung asüba mesüra yiruyibong asüba osang kecha mali aser iba osang zülü tashi nung takoksa anguba osang ano masadangtet lir.

Kohima nung pharmacies aser medical stores atema metetdaksür

Dimapur, April 2 (TYO): Kohima Deputy Commissioner, B. Henok Buchem, NCS ajanga Kohima district nung aliba pharmacies aser medical stores ajungai anidaksü tzüzüing-ozüing kar sangdongogo.

Schedule 'X', 'H' aser 'H1' mozü tem ya registered medical practitioner nungi prescription tejangja agütsüba nung ajemdaker prescription nung shia aliba agütsütsüla, ta ashi.

Item mozü ayokba osang tejangja pharmacy temi register ka nung bendentsüla aser yangji prescriber, patient, drug aser mozü kwi ayok, item tejangja agütsütsüla. Item record ya küm asem atema rizünga ayutsüla aser inspection mapang sayutsüla.

National Commission for Protection of Child Rights (NCPCR) Joint Action Plan nung shia aliba ama District Drug Controller Authority aser District Enforcement Force, Kohima ajanga tesüiba ita ana indang CCTV footage repranga jajatsü.

Iba tetuyuba sülen manidakertem Bharatiya Nyaya Sanhita (BNSS) nung Section 152 aser Drugs and Cosmetics Act, 1940 nung Section 28A aser danga tapet ozüing kübok merenshitsü.

Pharmacies aser medical stores ajunga dang item ozüing sülen shidak anidaka nokdanga aliba mozü tim masüba nung amshiba nungi kumzüksü tuyur, ta Kohima DC-i metetdaksüogo.

FMR agienba aser arrtsü atsüdangba anema Longwa nung lungkak ait



Kohima, April 2, 2025 (TYO): Indo-Myanmar international border atsüdangba aser Free Movement Regime (FMR) agienba anema Naga People's Front (NPF)-i Longwa nung lungkak aitba sentong tulu ka ayongzüka agiogo.

Iba rally ya Mongulbarnü agi aser NPF lennirtem aser Longwa nung tanishirtem o sensotemi shilem agia liasü.

NPF President Apong Pongener-i anir agiba sentong nung MLA & NPF Secretary General Achumbemo Kikon, Central Youth Wing aser Women's Wing teshimtet nübotem aden ta NPF Media Bureau-i ashi.

Longwa nung Chief Angh Tonyei Phawang, village council züngsemtem, kaketshir aser tetsür teloktem aser public adenshia shilem agi. Parnoki Centre lemtet magizüka ta shia banners aser placards amer lungkak ait.

NPF-isa Brihostibarnü Noklak district kübok Pangsha nung aliba international border nunga iba mesükba sentong ka ayongzüka agitsü.

"Burma aser India nüjiso mangudang nungi Longwa liasü" ta MLA Achumbemo-i ashi.

"Longwa nunger aser talisa lanurtemi parnok ali aser senmang kümzüka ayutsü. Parnok ali atsünga agitsü merangba akakanganga noktangtsü" ta Achumbemo-i Longwa Angh ajanga ashiba olen ka nenshia metetdaksü.

NPF-i arrtsü atsüdangba magizüker aser ibala inyakyim ajanga Naga nunger tsüngda telemsa madokdaksütsüla, ta paisa ashi.

Longwa nung Angh'er ki ya India aser Burma arrtsü anaprong nung lir anungji arrtsü atsüdangba ya temenünütsüka aser tebilemba tamajung yur lemtetba ka lir ta Achumbemo-isa metetdaksü.

"Asenok asen lima nung alir aser nisung shingaia asen ki lemsatsü makok. Naga nunger asenok temeten meteta lir aser India-i ibaji aziüoknür. Kechi ajurudir ajuruang asenok asen lima kümzüka ayutsü" ta paisa ashi.

"Tangar tashitem ajanga Naga nunger lemsatsü aser asenok Myanmar, Assam, Arunachal Pradesh, Manipur, aser Nagaland nung alir. Naga nunger longjemtsü mapangji tang ya lir aser asenoki asen sobaliba, inyaksangshi aser temetentem kümzüka ayutsüla" ta

Achumbemo-isa ashi.

"Centre sorkari "Act East Policy" aser "Neighbourhood First" mapa inyaker saka arrtsü atsüdangba ya item policy den meputep. Mapang ka Naga nunger lennirtem o jembitsü maongka magütsü aser India nung mezüngbuba Prime Minister Jawaharlal Nehru aser Burma Prime Minister U Nu nem memorandum magütsüdaksü. Iba ajanga Naga limatem tesem balala lemsa" ta paisa ashi.

"NPF-i McMahon Line magizüker aser sorkari Naga nunger litsü akhümtsübuttsüla. Asen temetentem akhümtsübu masü tashi asenok animesüngzüksü. Asen oboula nungeri noktakba ama asenoki tarutsü pututem atema noktaksüla" ta MLA Achumbemo-isa ayongzü.

Chief Minister Neiphiu Rio-i state assembly nung Free Movement Regime agienba aser arrtsü atsüdangba magizüker ta shiogo. Anungji Longwa aser temeket nung alirtem longjemtsüla aser ola ka dang adoktsüla, ta paisa ashi.

Iba sentong nung NPF president Apong Pongener aser Longwa village council chairman Yanlang Konyak natia o jemi.

Dimapur Police-i NSCN (Nikki) osang jangjashitsür; Advisor ka indang P.S. apu

Dimapur, April 2, 2025 (TYO): Dimapur Police-i apuba NSCN (Niki) züngsem pezü chiochtsü atema ACP East Dimapur aser Junior Officer ka nem sapon pongdang 25 nung Shanflower (SP) agütsü ta NSCN (Niki)-i sangdongba osang Commissioner of Police Dimapur-i jangjashitsüogo.

Nagaland sorkar nung Advisor ka P.S Iuto ajanga Dimapur Police nem sapon pongdang 25 agütsü ta aser iba ya tai tonglokja alirtem ket nungi apuba ta NSCN (Niki)-isa ashi.

NSCN (Niki) züngsemtemi Jahirul aser Eamaradul na apuba aser tashiyim agi asen meshiba ken o ka Nagaland Police tsüngdang benoka liasü.

Police-i mozü shibelenba atema bushisüngdang balaka tenzüka arudang Iuto jaok aser NSCN (Niki) züngsemtem chiochtsü atema sapon pongdangtem agütsüba indang asüngdang ta CP Dimapur-i ashi.

Iuto-i parnok dang Toluvi Village Council Chairman lia par medemer Atopu ket nung drugs miimbanga ayutsü agütsü ta ashiba osang NSCN (Niki) Ceasefire office-i March 30, 2025 nü Dimapur Police dang sangoktsü.

Atopu-i drugs ji March 29, 2025 nü Toluvi nung par para kidang miima ayu. Taoba nung NSCN (Niki) teloki tai tongloktsüba ama masü saka pai police ketdangsür shinga nem-a

drugs magütsü ta Iuto-isa nangzüka liasü ta CP Dimapur-isa ashi.

Iba ken o atema Dimapur Police-i maneni bushisüngdanga aodang Atopu'er kidang pai miima ayuba sapon pongdang 24 ngutet. Toluvi Village Council Chairman Bohoshe Awomi aser Council züngsem Shikheto Zhimomi na lia inyakyim lateta aliba ama drugs apu. Iba atema Iuto Swu aser Atopu Kiba naprong puogo aser tena NDPS kübok tai tonglokja lir.

Jahirul Islam aser Eamaradul Islam nati Manipur nungi Pherima tashi drugs bener aruba aser tenati drugs shibelener ta tai tonglokja NSCN (Niki) züngsemtem apuba osangji

tesülen ang meteta aküm ta CP Dimapur-i ashi.

Dimapur police-i bushisüngdanga arudang shanflower drugs sapon pongdang 24 dang nguteta lir ajisüaka Jahirul aser Eamaradul na dang asüngdangya asüdag tenati sapon pongdang 40 bener aruba shiogo. Iba ya NSCN (Nikki) züngsemtemi media dang sayuba ajanga shitak asütsü ama repranger anungji NSCN (Nikki) züngsemtemi shanflower drugs sapon pongdang 16 yua alibaji police nem mesüra Iuto mesüra Atopu ket nung magütsü ta CP Dimapur-i jangjashitsüogo.

Nisung pur aoba atema NSCN (Nikki) züngsem pezü pua aliba chiochtsü atema Dimapur

Police-i shinga den-a shanflower drugs meshitepa magi ta CP Dimapur-isa ashi.

Maneni, public, groups/ factions mesüra NGOs/CSOs ajanga drugs/narcotics shibelenba putetra tekaratiba nung na anasa aliba police station ket nung agütsütsüla kechiyong narcotics substances ayutsü ozüingi memelar ta Commissioner of Police, Dimapur-i nenshia metetdaksüogo.

Telungpur telok kari danga drug shibelenba indang osang metetra anasatiba police station nung Nagaland Police nem sangokjang mesüra Chairman CFMG/CFSB ajanga nenoki apuba drugs police ket tongjang ta CP Dimapur-isa ashi.

Old Timers-i 'Tampur Kümogo' ta ser ken video ka sayaogo

Dimapur, April 2, 2025 (TYO): "Tampur Kümogo" ta ser ken ka April 1, 2025 nü Rev. Onenlemla, Asso. Missionary, International Ministries-i meshiteta sayatsüogo.

Iba ken ya Old Timers ta ser Luyong nungi kentener teloki mejema atenba lir aser Dimapur nung sentong ka ayongzüka sayaogo.

Old Timers telok ya 1970 küm Molungyimsen nung tentetba telok ka lir aser Nagaland nung kentener telok tejentem rongnung parnoka ka asütsü.

Tang parnok rongnung tambusangji arishi küm 78 tain lir saka pai tanü-a ken kanga junga atenba dang masü Guitar atemer aser Mouth organ apur.

Iba ken video sayaba sentong nung Old Timers-i ashiba agi Molungyimsen nung electricity maliba mapang parnok telok ya tentet aser Christmas o New Year amala sentongtem nung shilem agitsü atema Amguri, Assam nungisa sound system taa agütsür bener arua shilem agia liasü.

Tanü putu ama masü 1970s mapangji asen lima ano main liasü aser kongki balala



amshitsübaji tamakoktsü liasü. Iba jagi parnoki süngpak agi solid guitar chitet aser idakji teka agi pick-up yanglua enokersa atem ta Old Timers-i ashi.

Parnokisa dokan nung süngjok amshiba box tazüng ali aser ibaji kaksar acoustic guitar yanglua atem aser süngpok nung shiruru teküp agi meybanger drums atem.

Old Timers mezüng tentetdang parnok züngsem ajak agi 6 liasü aser parnok

rongnung anabo akümüli toktsür ogo. Parnok züngsem ana- asür Imnasama 1980 nung aser asür Imsüyanger 2022 nung asü ta parnokisa ashi.

Küm 55 tashi lia arudang Old Timers-i Molungyimsen aser Luyong nung dang masü saka tesem aika nung sentong balala nung shilem agia aruogo.

Parnokisa Mon jila tonga oa kenten sentong nung shilem agiba menungraa bilemteta lemsatop.

"Tanü-asüng lanurtemi sentepsenchi nung shilem kangabo magir aser Khristan ken matener, anungji parnok ajungmesotsü atema onoki ken mejema atener. Tsüngremi dang arishia toktsüra onok tango mesatem tashi lanurtem ajungmesoa ken mejema atentsü" ta Old Timers rongnung tambusang N. Meren Aier-i osangbener dang ashi.

"Tampur Kümogo" ken

video ya parnok indang official YouTube channel- **Old Timers Molungyimsen (Luyong)** nung April 1, 2025 aonung 8:00 ako nung sayaogo aser iba osang zülü tashi nung 3,978 likes aser 47,319 views nguteta lir.

Tuli aser temeket nung dang masü saka tangalen sentong kar nung Old Timers jaoka shilem agidaktsünua asüngdangra nenoki oa shilem agitsü asü koda ta iba osangbeneri asüngdangdang "onok anema dang lira mulungsoa shilem agitsü" ta parnoki langzü.

Old Timers den Manager Udang Sanglir (9366399439) ajanga tongteprateptsü akok.

Old Timers:

N. Meren Aier, Vocals & Guitar.

I. Manen Jamir, Bass & Vocals.

Imkongtiba Jamir, Lead Guitar & Vocals.

I. Sentinungsang Mollier, Drums.

N. Samuel Lemtur, Guitar & Vocals.

K. Zulu Jamir, Guitar, Vocals & Composer.

I Wati Jamir, Keyboard/ Sound engineer.

NPCC-i International University Dimapur inyakyim aitsür

Dimapur, Rongchii/April 02 (TYO): International University, Dimapur (taoba mapang The Global Open University ta jaa aliba) ajanga tawa semzüka Central Library nem Rashtriya Swayamsevak Sangh (RSS) ngutetsang Dr. Keshav Baliram Hedgewar nüngja jaloktsütsü lemtetba ya tebilemdangtsü lir aser secular aser Constitution of India nung tamang akar tem ajungai aitsütsü langa lir, ta NPCC sangdong ka ajanga ashi.

Kaketnang amenokba ya tenüngsang agütsütsü langa lir, saka India lima Hindutva State kumdaktsütsü tangatetba nung tera yanga aliba RSS nguteter nem akhum agütsütsü ya University ajanga nisung bensaa amshiba sayur.

RSS ajanga kin tulu dak rangloker tasa balala yanglua mapa kuma inyakdang akhi mapang nungi timtem ajuruba aser linük nung kin tilatem rongnung kar aliba Nagaland nung University ajanga iba ama

meinprongtsü mapa inyakba ya Nagaland nung aliba nüburtem aser India tesem balala aliba kin tilatem zübu nung metsü inoktsüba den tepila mali, ta NPCC sangdong ajanga ashi.

International University ajanga iba ama telemsa adokdaktsüba mapa inyakba Nagaland Pradesh Congress Committee-i khukhua aitsür aser asen chirtem mulungsentsü menentsütsü merangba anema nokdaktsü, ta sangdong ajanga ashi.

Foot Safety ketdangsür temi chiyongtsü samples benden

Dimapur, Rongchii/April 02 (TYO): Food Safety & Standards Authority of India (FSSAI) ajanga inyakba National Annual Surveillance Plan (NASP) kübok Kohima, Mokokchung aser Dimapur Zone indang Food Safety Officers temi süngjang-lijang, aonsotsü, jenjang-menjang, mozü mamshiba chiyongtsü, chocolates densema confectionaries, packaged drinking water/mineral water, paneer & dairy analogues,

jiggery amala indang surveillance samples bendenogo.

Iba mapang Kohima, Mokokchung, Dimapur, Phek aser Tuensang nungi survey samples 97 bendena State Food Lab i.e. State Public Health Laboratory, Kohima aser National Accreditation Board for Testing and Calibration Laboratories (NABL) balala dangi yokogo.

Special surveillance drive dak alaka ano ita shia survey

aser enforcement samples atema food samples ya bendener.

Chiyongtsü tamajung den meyoktepba nungi kumzüksü, standards, labelling nung ashikülak mapa inyakba nokdangtsü, diary analogue products meshidakba azüoktsü aser food chain nung amshir aliba cooking oil tanaben amshiba mittsü/nokdangtsü asoshi item inyakyim maneni inyaktar.

KMC-i fire extinguishers inoktsü tuyur

Kohima, Rongchii/April 02 (TYO): Mi lendong nungi kumzüka alitsü mera tajungba agitsü aser lendong nungi kumzüksü mechi Kohima Municipal Council (KMC) ajanga par kübok aliba business establishments aser dokan ajunga nung May 31, 2025 tashinung portable fire extinguishers inoktsü totuyuba ka agütsüogo.

Kohima nung fire extinguishers peria maliba ajiteta KMC-i iba oset ya alia bener arua lir aser dangar den jenjang kasa nung ayoktsü. Anungji business kibur temi fire extinguishers ya KMC office nungi April 14, 2025 nü nungi tenzüka office mapang arua alia bener aotsü metetdaktsür, ta sangdong ajangasa ashi.

Executive Engineer, PHED Wokha ajanga metetdaktsür

Dimapur, Rongchii/April 02 (TYO): Executive Engineer, PHED Wokha, Er. Imnazulu Ao ajanga Wokha jila nung consumer ajunga dang Etsuchukha spring source nung tzu ajema akumba ajanga jila nung tzu supply agütsüba nung tetsükdaktsü ajurur ta metetdaktsüogo.

Meyi tzünglu aru metenzük tashi iba tensa ya maneni alitsü mesüra tamajungba angakumtsü, ta sangdong ajanga ashi.

Alinen aser yirpu ama alimar lendong balala ajanga transformer raksaba, electric post laoba aser

electrical pumping system raksar tangya Engorotchu source nungia tzu pump mesüteter, koba yanglushitsü atema mapang agitsü, ta ashi.

Item tebilemtsü benteta akok tashi tekeratiba nung tzu supply agütsütsü asoshi PHED Wokha division-i Power department den külemi teka amteper mapa inyaktar.

Metokmeperi atema sasar aser consumers tem dang amalitep akatsü aser tang department-i ajurua aliba tensa angatetsü ayongzüker, ta sangdong ajangasa ashi.

Tuensang DC ajanga Governor's Awards atema metetdaktsür

Dimapur, Rongchii/April 02 (TYO): Deputy Commissioner, Tuensang, Lithrongla Tongpi Rutsa ajanga Tuensang nung aliba Head of the Department aser Sub-division ajunga dang sangdong ka nung, August 15, 2025 Independence Day mapang Raj Bhavan Kohima nung "Eminent Practitioners, Teachers or Promoter of Art, Music and Literature in the State" nung Art, music aser Literature nung dangar dak alakteta tajung nem Governor's Award agütsütsü asoshi

Department in Tuensang that the Directorate of Art & Culture Kohima, Nagaland ajanga recommendations meshir, ta metetdaktsü.

Iba dak sendakba nung Tuensang District nung Heads of Office temi iba sempet angutsü langa aliba nisung tenüng tem den applicant indang Bio-data/Profile, shimtsü atema kuli, nüngdakba kuli kakat tem office nem April 30, 2025 tashinung agütsütsü, iba sülen sorkar nem agütsütsü, ta sangdong ajanga ashi.

NAGALAND POLLUTION CONTROL BOARD						
Signal Point, Dimapur - 797112, Nagaland Tel.: 03862-245727, TeleFax: 03862-245726 Website: www.npcb.nagaland.gov.in e-mail: npcc2@yahoo.com						
AMBIENT AIR QUALITY FOR KOHIMA AND DIMAPUR CITY						
KOHIMA ASER DIMAPUR NUNG MOPUNG MERÜK-MEMERÜKBA JENJANG						
Sl. no	City	Location of air station	Type of area	Monitoring dates		
				25.03.2025	27.03.2025	29.03.2025
1	Dimapur	Bank Colony	Residential	192	170	177
2		Dhobinala	Commercial	197	217	191
3		NPCB Office, Signal Colony	Residential	205	217	168
4		Tenyiphe, Chumoukedima	Commercial	121	123	117
5		Nagarjan	Residential	159	173	168
6		Viola colony	Residential	148	180	138
7		Burma camp	Commercial	221	253	209
8	Kohima	Opposite NST Office	Residential	62	122	131
9		PWD Junction	Commercial	102	150	157
10		High School Junction	Commercial	134	225	200
11		Midland (Upper)	Residential	90	158	147

Iba osang ya nübortem ajangzüksü atema Nagaland Pollution Control Board-i agütsür.

Sorkari Lok Sabha nung Waqf Amendment Bill benok



April 02, 2025 nü Lok Sabha senden nung Waqf Amendment Bill atema o entepdang Union Minister Kiren Rijiju-i jembiba noksa nung angur.

New Delhi, Rongchii/April 02 (Agencies): Bodhbarnü Lok Sabha senden nung BJP-i aniba sorkari Waqf (Amendment) Bill benokogo.

Senden nung opposition INDIA teloktep nungi MP temibo iba bill anema longkak aita liasü.

Joint Parliamentary Committee kati iba bill reprangshia ozüing kar yanglushiogo.

Senden nung iba Bill benoka o entepdang Union Minister Kiren Rijiju-i, Waqf Bill nungja Unified Waqf Management Empowerment, Efficiency and Development (UMEED) Bill ta melenogo, ta metetdaksü.

Rijiju-i, "Onoki benokba Waqf (Amendment) Bill nung Joint Parliamentary Committee-i benokba onük aika densema lir. Iba bill nung JPC-i benokba tebilemba onüktem maden, ta jembibaji tai. Waqf Bill nungja ya Unified Waqf Management Empowerment, Efficiency and Development (UMEED) Bill ta melenogo. Iba ya ajanga teimla agütsür," ta ashi.

"Onoki temelenshi aika benokogo, anungji kechiba onok anema nokdaker? Iba bill nung shilem magirtem dang yazü shiogo aser iba bill anema nokdangtsü atema ajungmesoogo," ta pai ashi.

Iba bill nung o entepba mapang Congress lenir KC Venugopal-i, Centre sorkari iba bill ya kangshia agizüktsü meranger, ta ashi.

"Nenoki senden nung iba ama bill (Waqf Amendment Bill)

benoker, shidakba agibo iba ozüing yanglushitsü atema züngsemtem nem tashi agütsütsüla. Nenoki iba ozüing kangshia agizüktsü meranger. Iba ozüing yanglushitsü atema nenoki mapang agütsütsüla. Iba bill nung ozüing teyanglushitsü aika lir, ajisüaka mapang mali," ta pai ashi.

Iba dak sendakba nung Union Home Minister, Amit Shah-i, "Joint Parliamentary Committee ka tentetsüla, ta akangbaji nenok (opposition) lir. Congress amai onok committee mali saka onok democratic committee dang lir," ta ashi.

"Onok committee-ibo o lemteper aser metongshir. Temelenshi benokbatem magizükra committee aliba tetetzüji kechi?" ta pai asüngdang.

RSP nungi MP, NK Premachandran-i inyakyim dak sendakba asüngdangba langzüdang Amit Shah-i, JPC report nung ajemdaker union cabinet-i iba bill yanglushiogo, ta ashi.

Rijiju-i, India nunger democratic puti otsü nung JPC-i ajak den jembishinüa inyakba maparen rongnung iba ya tulutiba liasü, ta ashi.

JPC-i temepishiba shidi balala densema tebilemba lakh 97.27 asadanga iba report renem; telok 284-i iba bill nung parnok tebilemba lemsatepogo, iba denji külemi states aser Union Territories 25 nungi Waqf boards-ia tebilemba lemsatepogo, ta Rijiju-i metetdaksü.

Paisa, legal tsütsü mongintem, charity organisations, shisashirtem aser yimsü lenirtem densema aikati iba bill dak sendakba nung parnok tebilemba lemsatepogo, ta ashi.

Rijiju-i, "Tangbo Shia Muslims, Sunni Muslim, Bohra aser backward Muslims, tetsürtem aser Muslim nunger masüba mongintem-a Waqf Board nung alitsü. Ni iba indang rasa-a shidi. Ni atishia jembidi. Tatishitsü agi ni Muslim nunger masü saka ni minority affairs minister lir. Iba sülen ni Central Waqf Council nung Chairman aküm nunga kü tebilemba magitsü akok, kechiyong iba Council nung Muslim nunger masüba züngsem 4 dang alitsü aser iba nungjia züngsem anabo tetsür asütsü," ta metetdaksü.

"Waqf Board-i Muslim nunger tekülem ki, Hindu nunger tekülem ki mesüra yimsü dak sendakba tesem ka atema kecha mesütetsü. Iba ya kiojen ketdangtsütsü atema dang lir. Ajisüaka Waqf kiojentemji Waqf Board aser Mutawalli-i ketdangtsütsü. Iba ya angatetsü mekokra iba dak alia ni kecha meshitetsü," ta pai ashi.

"Iba Bill nung metokmeperi kar liasü, anungji yanglushitsüsa aküm," ta pai ashi.

"Waqf board bo takar saka India nung Muslim nungertem sensaka dang alir. Alima nung Waqf kiojen tulutiba alibaji India nung lir, süra kechiba ibai sensaker Muslim nungertem shisaliok, medical treatment, skill development aser income atema mamshir? Kechiba tang tashi terenlok mali. Ato kilonser Modi kübok iba sorkari sensaker Muslim nungertem taküm jenjang tajungba akümsü atema inyaker, süra kechiba iba ya (bill) ashishir," ta pai asüngdang.

Paisa, "Linük nung Waqf kiojen lakh 4.9 aliba nungi tanübo lakh 8.72 kümogo. Waqf kiojen lakh 8.72 ya junga amshitetra ibaji ajanga Muslim nunger taküm jenjang tajungba akümba dang masü saka linük tia-a melentsü," ta metetdaksü.

Tir Droupadi Murmu-i Portugal aser Slovakia na semdangtsü

New Delhi, April 02 (Agencies): Tir Droupadi Murmu-i April 7 nungi April 10 tashi nung Portugal aser Slovakia na semdangtsü.

April 7-8 anogotem nung Murmu-i Portugal semdangtsü; Portugal Tir Marcelo Rebelo de Sousa-i jaokba nung ajemdaker lai iba linük semdangtsü, ta Bodhbarnü Ministry of External Affairs (MEA)-i metetdaksü.

"Küm 27 sülen Portugal semdangtsü. India aser Portugal na tsüngda tesendaktep yangluba sülen küm 50 ajungba mapang nung lai iba linük semdangtsü," ta MEA-i metetdaksü.

Murmu-i Portugal Tir den

senden amentsü. Lai Portugal Ato kilonser Luis Montenegro aser National Assembly Tir Jose Pedro Aguiar-Branco nata ajurutsü.

Lai Portugal semdangba ajanga linük ana tsüngda tesendaktep ano tajungba akümsü.

April 9-10 anogotem nung Murmu-i Slovakia semdangtsü.

Lai Slovakia Tir Peter Pellegrini aser Ato kilonser Robert Fico na den senden amentsü. Lai National Council of Slovak Republic Speaker, Richard Rasi-a ajurutsü.

Portugal aser Slovakia naprongla nung lai India nungertema ajurua jembitsü.



New Delhi, April 02, 2025: Bodhbarnü New Delhi nung Delhi Assembly nung opposition lenir, Atishi den AAP MLA temi Delhi Law & Justice Minister Kapil Mishra anema longkak aitba noksa nung angur.

Temang shilem tenla agütsür nem casual leave anogo 42 agütsür

New Delhi, Rongchii/April 02 (Agencies): Temang shilem tenla agütsür central sorkar mapa inyaktertem nem special casual leave anogo 42 agütsür, ta Bodhbarnü Lok Sabha nung sorkari metetdaksü.

Tasüngdangba ka langzüdang Union Minister of State for Personnel, Jitendra Singh-i, "Central sorkar mapa inyaktertem aser temang shilem tenla agütsürtem nem India sorkari anogo anogo 42 tashi special casual leave agütsür," ta metetdaksü.

Registered medical

practitioner/doctor-i benokba nung ajemdaker temang shilem kar tenlatsü atema surgery koba yimya nung agidir agiaka anogo 42 tashi special casual leave agütsütsü atema 2023 küm Personnel Ministry-i sangdong agüja liasü.

Special casual leave ji hospital nung admit asüba anogo nungi methitemi anogo 42 agütsütsü, ta Ministry-i metetdakja liasü.

Ajisüaka nüngdak dang süra surgery agitsü jakdang hopta ka jelia nungi special casual leave ji agi tenzütsüa akok, ta ministry-i metetdakja liasü.

Parliament senden tembangba sülen BJP-i party Tir shimtsü

New Delhi, Rongchii/April 02 (Agencies): Tang tagidak Parliament senden tembangba sülen Bharatiya Janata Party (BJP)-i party national Tir shimtsü.

Tang tagidak budget senden ya April 4 nü tembangtsü.

2020 küm JP Nadda BJP National Tir shima liasü, aser Lok Sabha election agitsü aliba agi pa kümsükji yaküm June ita tashi atsülanga liasü.

Lok Sabha election nung BJP-i takok anguba sülen JP Nadda nem Health & Family Welfare Ministry aser Chemicals & Fertilisers Ministry lezmüksü. Pai tang tashi BJP National Tir-a

repsema inyakdar.

BJP-i National Tir shimtsü atema lenla aika nungi asadangtsü. BJP National Tir January ita nung shimtsü sentong liasü, ajisüaka Delhi assembly election aliba aser state units aika nung Tir election magiba ajanga thinen.

BJP National Tirji electoral college-i shimtsü. Electoral college nung state Tirtem aser tanga züngsemtem densema lir.

Tang BJP National Tir teinyakdak JP Nadda lenisüba kübok BJP-i state 35 election nung toktep aser state 16 nung takok angu. Iba dak alia pa lenisüba kübok taoba Lok Sabha election nunga takok nguogo.



April 02, 2025 nü Parliament House nung Lok Sabha nung Opposition lenir, Rahul Gandhi leniba nung Congress Parliamentary Party senden amenba noksa nung angur.



TIR YIMYIM YIMOBILEM (EDITORIAL)

DIMAPUR THURSDAY, APRIL (RONGCHII) 03, 2025

Tuluri sübokrem meshir ?

Nagaland renloknüseta merenlokba tashidak ya ajak dak keta lir saka tashidak tenzükbajibo Nagaland government mapa nung ketdangser tulerter dak nungi tenzüker. Hau, nübortem daka teindang shisatsübo mali saka nübortem rongnung lenir aser ketdangsertem dak alima meimba teindang aser ochi shisatsü lira, nübortembo tajungba küma melenshitsu, kechiyong nübortembo lenirtemi aniba sülen anidaksü. Atangji, shibaibo ochimashiba tai tongloktsü nung anganütsü, anungji kecha nunga shitak aser ochibo mali saka ajak nung meshitak kümer kati ka dak tai tongloktsütepba mapang, tanü yangi tai ajak tulerter nem tongloktsüba yagi asen lima nung tashitemetet aser rongsen akar tashi taitertem ajak den tsükchi ayimer amai ola adoker. Ajisüaka, kima dang masü saka kilong nung dena auer aita awazüa ngur olajang kata madok yutsüra, oda odabo kidang kilong nung akaba osettemji dang masü saka ali kimongji dena parnok meyonga ta kümadoktsü, idangjibo nübortembo alima tasen bushia oagi mesemtettsüsa akümtsü. Ajisüaka, tanü asüng otsüla oboula nungur putu alima tazü mapang amato masü, tanübo alilen dang masü saka anüng dena kibur maliba tesem tilakata mali kümogo, anungji nübortem asoshi pei mulungba shimteta liyonga aotsü atema mapa ana dang lir, kaji auer lenirtem sülen aremzüka anidaksü mesüra auertemji pua metongshitsütsü ? Ashiko, tesem kar nungbo tuler-a tuler yari aser tilar-a tilar yari ta auyatepba agi office nungbo alpin alitsüa mali timtema alitsüa akok. Kasaji, tanü nübortem rongnunga yimtaklirtema yimtaklir yari aser town nung alirtema town nung alir yari arok atema terenlok mapa inyaksü asoshi tulerter pei shilem agizüker yokba sen-o-tsü agi peiang magishi aser mechishi kümer auer auer koda mapuba tia ka nung alitsüa akok. Aji oda, terenlok mapasa asüyonga asen lima nung renlokba yabo ali nung nübortem tajangzük angutsü atema terenlok mapatem inyakba agi renlokbater masü saka akhi mapang tilar aser sensakertem tuler mulung akoktsü atema sübokrem amshiba otsü jembia angashiba to jet ta meyipteper, tanübo tulertermiang tilarter dang parnok asoshi terenlok mapa inyaksütsü atema government-i lemsütsüba sen nungi sübokrem shilem ka magütsü tashibo sign masütsü ta ashiba terenlok tasen otsü angashir. Kasaji, nübortem alidak terenlok mapa mechimenu inyaksüba sentong ajak nung tuler pei agitsü shilem ka luzüka yur tilarter nem agütsü dangbo tagitsüjibo yutsü mapaa meinyakshi akümba timtem ajuruba osang temulung shirangtsüka angashir. Iba ama ochimashi mapatem ya kodang bilemdangdir, Nagaland ya kibong ka nung tetsü asübo la kinungbo aser tanurtem ajaki la nembo chia tebok sünga mechiyongdaktsüi timtemdaktsüba agi kongraseta kümer soru raksa amai süla. Iba ama tenük agibo angur aser tenarong agia angashir saka temulungjang nung akseta bilemba agi tebang agibo koda-anga mejembi ta asen lima nung tuler agi tuler memesük meshimetsü kümer makmanüa pei lima kadaktsütsü melen peiang mashilen nungi akatsü merangba angudang, asen lima nungbo tulerter ya tazünga 'degree' aliba dang ashi, aika 'educated' nisung masü südi ta tezüdanga repranger. Education tetezü nisung ka shisa tenük lapoka tajung inyaksü metetba ta ashitsüa akok. Aji oda, Education yagibo sobaliba aser awashi memeteti alirtema meteta kümdaktsü aser ochimashi inyakyim nungi ochi leni meyipdaktsü aser tamang nung alir nübortem tesangwa dangi anir. Aji oda, education ya nisung ka asübo nübortem nungdak ajak yangluteta agütsütetba nisung ka süla. Ashiko, tanü asen lima nung tulertermi anir asenok ajak meshitak akümba ya, asenoki education bushi masü saka tazünga degree aser title dang bushiba agi asütsüa akok. Iba jagi asenok nübortem anepaluba mapa nung kobatetka ulua kümdir, iba yariji tajung tuluba inyaker masü saka pei mapa uluba yari pei asoshi nübortem shilem nungi tuluba luzüksü meranger. Item ya nübortem tenzüker, public servants, masü saka nübortem asoshi tarütsü 'public termites' kümogo. Iba yabo parnoki parnoksasa melenshisüla, idangjiang asen lima melenshitsu.

OLEMSABANG

NENOK ANEMA O BENDANGTSÜSA NENOKI O TEBENDANG

~ L.Kika Pongener.

Asen mimchir aika dak keta aliba tashimait kaji asenoki asen sasa obendanger akümer aser tangar o bendanger. Asenoki aiben tejangja memetet sernung olulu kar angashir tangar kar aitsü aser karbo medentsü. Ano mapang kar nungbo asenok anema tamajung meinyak aser mejembi sernung, tangar kari tiyazü otsü /osang kar purateta yanglur o tutepba agi asenok kati ka tsüngda nung mepelateper aser jashiteper. Asenok alima nung alidang, alima ya temenen lima asünung, kari mapa tamajung inyaker, kari aibelener, ano karibo aibelen masü sernung, kari pei temeden ngunudang shitak-to tai kümtsü aser ochiba-to meshitak kümtsü. Ano nisung karbo jakdaka aibelener sernung asenoki tepo küma aibelen masü kümtsü / medentsü, mesura mimbanga/ nembanga yutsütsü meranger. Laishiba nung...."Nenok o bendangtsüsa nenoki o tebendang" ta ashiba olong ya...Yisu alima nung alidang Pai jembiba o ka lir. Aser iba o ya tanü asen putu dena kangasa tapet lir. Asenoki aiben tangar o bendanga aibelen masü sernung aibelen kümtsü aser karbo aibelener sernung medenja jembir. Yisu-i shiogo...."Nenok anema o bendangtsüsa nenoki o tebendang, kechiaser kechiobendang agi nenoki bendangdir, nenok o yamaji bendangtsü" (Mathi-7:1-2).

Ano Yisu-i yamai shia lir.... "Kechiba nai ne tenuk nung aliba anak tuluji mungui yur ne adianu tenuk nung aliba anak tilaji ajir ?" (Mathi-7:3). Asen mimchiri aiben asenoki pei aibelenba-bo mangur, saka pei adianu, aianu, pur-medemsor, temba-tinur, kiyong-kidanger, külem lisemer aser külemi tenzükeri aibelenba dang kishia bushir. Asenoki aiben tangari inyakba mapa nungpo tajung mereprangteter, langka mesura langka nungpo aibelen karbo ajitettsü, junger-ko saka yamai dang aja ta indang-indanga junger ta meshiteter. Anogo shia asenok libaliro aser jembishinuba nung asenoki tangar aitsüa jembiba ajak ya tangar anema obendang agütsü ta angatetdi. Asenoki tangar anema tiyazü kuli agütsüba ya-a tangar anema obendang agütsü ta angatetdi. Obendangdak sabang (Court) ka nung obendang agütsüba dang obendang masü, asenok tenzüka lokti nung asenoki olepdang agütsüba ya-a obendang agütsüba den küsa ta angatetdi. Asen Ao oshi nung obendang aser olepdang ana ya tepila mali asütsü. Sorkar-i ayuba obendangdak sabang (Court) -ji dang obendangdak sabang masü....Saka aseni aniba/tenzüka loktiliba ajunga ya obendangdak sabang ka-ka mesuka lir ta angatetdi. Anungji aseni aniba loktiliba ajak nung asenoki tashiyim agi azüoktsü /akoktsü meranga masü, saka tarutsü nung metsükdaktsüsa kanga junga bilemdanger olepdang agütsütsüla.

Lennir ajaki asen tenzüka aser aseni aniba lokti nung indang-indanga olepdang agütsü asü (?) Mesura aibelena olepdang agütsü ibaji kanga junga shisadangdi. Ashiko, lokti nung lennir karibo pei tebilemba kar ataloknudangaibelena olepdang agüja alitsü akok. Obendangdak sabang (Court) ta asüba ya asenoki sorkar-i ayuba Dobashi Court, District Court, High Court, Supreme Court, item ya dang obendangdak sabang amai bilemer. Aser karibo item Court jagi aotsüba temenen amai bilemtsü akok....Mesura item Court nung nokdakbaji aibelena aliba agi nokdaker amai bilemtsü akok. Mesura item Court nung obendang agütsüba dang temenen amai bilema alitsü akok. Ajisuaka, kanga junga shisadanga, obendangdak sabang ya tai mali, mesura aibelena meinyak sernung.... Aibelenogo ta aitsürtem atema pei temeden bushidak sabang ka lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

MP nung Hindu teloktemi ainlen senzür Khristantem nokdang



Police station nung Khristantem dang asüngdangyaba mapang tangokba noksa nung angur.

April 02, 2025: March 31, 2025 nü Madhya Pradesh state kübok Jabalpur nung right-wing Hindutva organizations nungi züngsemtemi Khristantem mena aliba bus ana nokdang, aser parnoki tangartem Khristan yimsü dangi meypdaksür ta tai tonglochtsü.

Osang angazükba agi, Mandla district nungi bus ana nung tribal Khristantem Jabalpur-i oa liasü aser parnok Mandla-i meypa aruba mapang nung Vishwa Hindu Parishad (VHP) densema Hindu telok balala nungi züngsemtemi bus anapronglaji nokdangba sülen Ranjhi police station-i ani ao.

VHP District Coordinator, Aarti Shukla-i, Mandla nungi tribal nisungtem Khristan yimsü dangi meypdaksütsü atema Jabalpur-i anir aru, ta metetdaksü.

Ranjhi Police Station nung office in charge, Manas Dwivedi-i, bus nung mena alirtemji Mandla district kübok

Mohgaon nung alirtem liasü; yimsü dak sendakba nung parnoki Bhawartaal Garden semdang, ta metetdaksü.

"Item nisungtemji Tenla ki ka semdangtsü atema bus nung aoba mapang nung Vishwa Hindu Parishad densema Hindu organization kar nungi züngsemtemi bus ji nokdang. Bus ji anenba sülen driver jena oadok," ta paisa metetdaksü.

"Police-i asüngdangyaba mapang nung passenger tem jagi, parnok tetsü-tebou nungertemi Khristan yimsü agizüka liasü aser parnok-a Khristantem lir ta ashi. Police-i passenger ajak tenüng aser talidak asüngdangogo. Parnok maitüsü jangjatsü atema Mandla district nung ketdangsertem den onoki tongteprateptsü," ta paisa metetdaksü.

March 31 anepdang Sanjay Tiwari aser Navin Singh Rajput na leniba nung VHP züngsemtemi Bhawartaal Garden nung Khristantemji

soita liasü.

VHP züngsemtemi, Maharajapur aser Mandla na nungi nisung 40-50 shi Khristan yimsü dangi meypdaksütsü atema Bhawartaal Garden-i anir ao, ta tai tonglochtsü.

VHP züngsemtem aruba mapang nung Khristantemji aritepa bus telungi tuadokba sülen ajen, ta parnokisa metetdaksü.

Iba sülen VHP züngsemtemi bus ji arishia ao aser Ranjhi kübok Bada Patthar nung anendaksüba sülen police station-i anir ao.

VHP züngsemtemi Khristantem nem tai tonglochkaka Ranjhi Police Station nung Officer in Charge-ibo, "Kangshia Khristan yimsü dangi meypdaksüba kuli mali," ta shiogo.

Iba osang angashia Jabalpur (Madhya Pradesh) Diocese nung Vicar General, Davis George police station jagi oa Khristantemji ajurua liasü.

Pastor Pagadala asüba tatalokba ya jungjunga bushisüngdangtsüla, ta takhangba agütsü.

NCC-isa, tesempa o jembirtem nem temerenshi agütsütsüla, kechiyong tesempa otem jembiba ajanga Khristantem anema inyakba kanga bulua ataloker, ta metetdaksü.

NCC Tir, Dr. Sam Paul Kolakaluri-i, Pagadala ajungbena asüba nung ya melung malemtsüsa kuli aika lir, ta metetdaksü.

Paisa, Khristan sayutsüngirtem anema tesempa o jembiba ajanga Khristan anemertem tasü itdaksür, ta metetdaksü.

Kolakaluri-isa shidi ka ajanga National Human Rights Commission of India dang pastor asüba tatalokba ya judicial ajanga bushisüngdangtsü takhangba agütsü.

Pastor Pagadala den tatabangbuba asüpila sentong Hyderabad nung agiogo aser iba sentong nungji nisung lakh 1 jungnüa aden.

ANOGO ABEN TSÜNGREM DEN

Ni Metsübur (T. Ken 27: 1- 6)

"Kibuba kü tesangwa aser tekümtet: ni shiba Tsübutüsü? Kibuba kü taküm tashi: shiba dang ni tsübutüsü?" (t.1). Item ya tasüngdangbatem tajung lir. Kechiba asenoki tsübua alitsü? Asenoki asen tsükchir ajuru dang Tsüngremi asenok dang kechi inyak aser asenok asoshi kechi inyak? Iba ken yagi asenoki Kibuba tsübura , asenoki tangar shianga tsübutüsü mali ta ashir.

Dawidi tsükchir aruba indang jembi, "Tamajung inyakertem kü shi achitsü kü dangi arudang, oda kü merirtem aser kü tsükchirtem, parnok metsüdaksü aser alangtsü" (t.2). Yangi tsükchir ajungbena aruba indang ashir. Tekong 3 nung, "Temeranger telok ni anema liaka, kü mulungi metsübutüsü; ni anema rara adokaka idangjia ni temulung alemtsü." Na ner kidang mesüra office nung mesüra arogo nung tsükchir alitsü akok. Ne taküm nung tesem ka nung tsükchir anema alitsü akok.

Saka Dawidi ashir, "Kü mulungi metsübutüsü; ni anema rara adokaka idangji ni temulung alemtsü"(9t.3). Ibai ajungben adokba mesüra temadokba rara masü. Ibai anogo shia raraba lir. "Ni anema rara adokaka idangji ni temulung alemtsü"(t.3). Asenoki Kibuba dak temulung alemtsü akok, kechiaser Pa asenok tesangwa lir; asenoki ammag tsübutüsü mali. Aser Pa asenok tekümtet asünung asenoki lendong tsübutüsü mali.

Kibubai agütsüba tekümtet asenoki koda agizüktsü? Khrista dak aliba ajanga . "Ni Kibuba dang langka meshiogo aji ni bushitsü. Ibaji ya, kü arishi tepiyong Kibuba kidang lia Kibuba tebur ajung reprangtsü, aser Pa tenla kidang asüngdangtsü." Ne tashi mait aser meperiba tsübua teli. Tsüngrem ne tesangwa, ne tekümtet aser tashi lir. Ne nüngdak ajak Pa lir.

Tetsübu sotba jagi temulungjang, tekolok aser temulungtetba lulaa kümdaksür. Saka Khristantem aseni ajurutsüba tetsübu dang nungi tashi tuluba ka kar. Na tetsübu den rarateper asü? Kechi rara südir süang, Tsüngrem tekümtet nung temulung lemag. Pa ne tashi, aser Pai na kümzüksü.

Reshikangshi ajangshiba Khristan-tem kümzüksü atema UN meinyaker

April 02, 2025: Linük aika atema linük karbo UN nung Khristan meyrjang aikati reshikangshi ajangshir, ajisüaka item Khristantem kümzüksü atema United Nations-i kecha meinyakteter, ta International Christian Concern (ICC)-i metetdaksü.

Linüktem tsüngda yimjung ajungkettsütsü aser yimsü temeden densema meimchir temeden balala kümzüksü atema 1945 küm UN tenteta liasü. Mezüngbo UN nung züngsem linük 51 dang liasü saka tangbo züngsem linük 193 lir.

1948 küm United Nations-i Universal Declaration of Human Rights (UDHR) agizüka liasü, aser iba bangzüng kübok yimsü temeden densema meimchir temeden balala kümzüksü atema bangjema lir. UN Arrla 18 ajanga nisung ajak nem yimsü temeden agütsütsü shia lir.

UDHR kübok UN nung züngsem linüktemi meimchir temeden balala aser yimsü temeden kümzüksü atema UN den amalitepa inyaktsü tenangzüka agia lir.

Ajisüaka alima tesem balala nung reshikangshiba Khristantem kümzüksü atema UN-i junga meinyakteter aser aibelenba linüktem anema kecha meinyakteter.

Khristantem anema inyakba

NCC-i Pastor Praveen Pagadala asüba bushisüngdangtsü akhanger



Pastor Praveen Pagadala

April 02, 2025: South India nung arrshi küm 45 pastor, Praveen Pagadala sür lia anguba sülen Khristantemi ketdangsertem dang iba tatalokba jungjunga bushisüngdangtsü akhanger; National Christian Council (NCC-ia iba tatalokba jungjunga bushisüngdangtsüla, ta takhangba agütsüogo.

March 24, 2025 nü Pastor Pagadala convention kati motorbike ka nung apusoa liasü, ajisüaka tasüngep gari lenmang tiplen pa tasümgang angu.

Mezüngbo police-i pa ya gari lendong nung asü ta sangdonga

liasü, ajisüaka Khristantemibo pa ya kari tepset ta melung malemer.

Khristan mungdang ka nung adentsü atema March 24 nü pa motorbike nung apusoa liasü, ajisüaka tasüngnep pa tasümgang angu.

Pa indang motorbike ji pa temang madak liasü, pa tejak nung zübo aser azü liasü saka temang nungbo zübo kecha maliasü. Iba dak alia motorbike nunga tarak kecha maliasü, anungji iba ya lendong atalokba masü saka kari pa tepsetba lir, ta melung malemer.

Pa tola nunga ajichilen tsüngsem tarak liasü aser tasümgang anasaji süng tejaksa nung azü keta liasü. Item kuli ajanga pa ya kari tepset ta bilemer.

Pai yimjak nung Khristan yimsü pusema jembi aser tanga yimsü aitsü, ibayongji pa tsükchir aika liasü.

Hopta ishika tejaklen pai kar dangbo pa taküm amokmeren tia nung aliba lemsateper liasü.

National Christian Council (NCC)-ia ketdangsertem dang

Pastor Pagadala asüba tatalokba ya jungjunga bushisüngdangtsüla, ta takhangba agütsü.

NCC-isa, tesempa o jembirtem nem temerenshi agütsütsüla, kechiyong tesempa otem jembiba ajanga Khristantem anema inyakba kanga bulua ataloker, ta metetdaksü.

NCC Tir, Dr. Sam Paul Kolakaluri-i, Pagadala ajungbena asüba nung ya melung malemtsüsa kuli aika lir, ta metetdaksü.

Paisa, Khristan sayutsüngirtem anema tesempa o jembiba ajanga Khristan anemertem tasü itdaksür, ta metetdaksü.

Kolakaluri-isa shidi ka ajanga National Human Rights Commission of India dang pastor asüba tatalokba ya judicial ajanga bushisüngdangtsü takhangba agütsü.

Pastor Pagadala den tatabangbuba asüpila sentong Hyderabad nung agiogo aser iba sentong nungji nisung lakh 1 jungnüa aden.

Eritrea, Pakistan aser Vietnam linüktem nung Khristantem kanga reshikangshiaka UN-i item linük atema meinyakteter.

AO OSHI ANGAZÜKDAK:**TANÜ ANGAZÜKTSÜBA OJANG****Tembang**

(n) süng lentoker tazüng toktsüba (stump)

* Asangbai süng tembang agi menden kanga junga yanglur.

Tembar

(n) medemer (friend)

* Onok tejen tembar aika ajurutepa pelatep.



Tir Yimyim

OLONG PAITEP # 7111

	1				2	3			
4			5						6
						7			
	8								
	9			10			11		
						12			13
14									
						15			

TIPLIN

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

-

(4)

-

(5)

-

(5)

-

(4)

-

(9)

-

(4)

-

(5)

-

(5)

-

(4)

LANGTSÜNGLEN

1. _____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. _____ kibur
13. Tebur tembar tsüngda jatepba

-

(4)

-

(6)

-

(5)

-

(5)

-

(5)

-

(6)

-

(6)

-

(5)

-

(4)

OLONG PAITEP # 7110 TELANGZÜBA**TIPLIN :**

1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

Happy Birthday**TENÜNG**

: RESHIBEN IMCHEN

Tasoba küm

: 3rd April, 2023

Talidak

: Diphuphar, Chumukedima

Küm

: 2

Tsüngremer tesüngmatsü taochi ajanga Reshiben Imchen küm ana tashi arishi moatsü nung teyanglur Tsüngrem nem tenüngsang tulu agütsür ano maneni Tsüngremer tazüokba kübok arishi talang moaja len aniang ta sarasademtsür

HAPPY BIRTHDAY

Temeim Aya, Aba, Adi, Azüh, daddy aser Kinungertem



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela
Tasoba Anogo



1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NEHU kaketshirtemi VC Prof Shukla agientsü akhanger

Guwahati, April 2, 2025

(Agencies): North-Eastern Hill University Students' Union (NEHUSU) aser Khasi Students' Union (KSU) NEHU Unit-i Mongulbarnü Meghalaya sorkar dang NEHU Vice Chancellor Prof PS Shukla mapang nungi anentsütsü takhangba agütsüogo.

Kaketshir teloktemi cabinet ministers- Ampareen Lyngdoh aser AL Hek nem memorandum ka agütsü aser idakji NEHU nung ketdangsübaren tamakok angubatem shia lir. "North-Eastern Hill University nung ketdangsübaren tsütsü

tebilemtsü balala ajurua aliba onoki iba memorandum nung shia lir. NEHU nung kaketshirtem, faculty, aser non-teaching staff dak kongshiba tebilemtsütem reprangshimtsü mepishir" ta parnoki ashi.

NEHU nung sendaktepa alirtemi Prof Shukla anema lungkak aityonga arur. November 5, 2024 nü kaketshirtemi lumia lungkak aitba sentong ka agiba sülen tensa tamajungba aküm aser Ministry-i nüngdakba mapang inyaksü ta nangzükba ajanga dang iba sentong athi ta kaketshirtemisa ashi.

Ministry-i November 14 nü Inquiry Committee ka tenteta bushisüngdang tenzük. Parnoki campus semdanga senzüba aser kulitem agüjaka tang tashi mapang kecha meinyak lir ta NEHUSU aser KSU NEHU Unit ajanga metetdaksü.

Assam Panchayat election: May 2 & 7 polling, May 11 counting

Guwahati, April 2, 2025

(Agencies): Assam State Election Commission Alok Kumar-i Panchayat election elections indang osang metetdaksüogo.

Assam nung shilem ana lemsar- May 2 aser May 7 anogotem panchayat elections agütsü ta Alok Kumar-i ashi.

Iba sangdong agütsüba sülen candidate temi April 3 nungi nominations agütsütsü akok aser April 11 nü commission-i nomination reprangtsü.

Anogo anaprong anepdang 7:30 ako nungi nikongdang 3:30 ako tashi polling asütsü ta Kumar-isa ashi.

Election mezüngbuba shilemji upper Assam aser Barak Valley nung agütsü aser tanabuba shilemji lower Assam nung agütsü.

Election anogo nung voting percentages metettsü aser May 11 nü votes azüngtsü ta Alok Kumar-isa metetdaksü.

Arunachal anentsüh ajanga Anjaw den connectivity mali kümogo

Itanagar, April 2, 2025

(Agencies): Arunachal kübok Anjaw-Mompani lenmang nung anentsüh tulu ka aluba ajanga Anjaw-i moutet kümogo.

India-China arrtsü nung Anjaw ya tatembangba district lir aser anentsüh ajanga civilian dang masü saka army convoy dena mesenzütet kümogo.

Anentsüh ajangasa Walong aser Kibithu amala frontier regions-i moutet kümogo aser iba ya India defense atema kanga tongtipang tesemtem lir.



Manipur Chief Secretary Prashant Kumar Singh-i 'Awards Ceremony of Incentive to Government School Students Who Excel in High School Leaving Certificate Examination and Higher Secondary Examination for the year 2024-25' nung kaketshir 58 nem sempettem agütsüogo. State level nung mezüng nungi pezübuba jenjang takok angurtemi Rs. 5,00,000, Rs. 4,00,000, Rs. 3,00,000, aser Rs. 1,00,000 senpettem agütsü. District level nung 70% marks tema anguba kaketshirtem nem Rs. 50,000 (1st position) aser Rs. 25,000 (2nd position) senpettem agütsü. (Imphal, April 1)

**GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA.**

Website: www.highereducation.nagaland.gov.in Email: dir.highedu@gmail.com

NO.HED/SCHO/2022-23/532

Kohima, dated the 2nd April, 2025

DISBURSEMENT OF POST-MATRIC SCHOLARSHIP TO ST STUDENTS

It is hereby informed to all the beneficiaries of the Post Matric Scholarship to ST students that the Scheme Implementing Agency will disburse the final instalment of Post Matric Scholarship 2023-24 with immediate effect. Further, payment of the first instalment for 2024-25 shall be initiated at the earliest as per the sanction given by the Ministry of Tribal Affairs (GOI), which will be an Aadhaar-based payment. Therefore, beneficiaries are instructed to ensure the linkage of their bank account with Aadhar for a smooth transaction.

Sd/-
(MENUOKHOLIE KIRE)
Joint Director

Higher Education, Nagaland: Kohima.



03-04-1935 to 03-04-2025

Celebrating 90th Birth Anniversary
of God's Faithfulness

O. LANUCHUBA IMSONG
UNGER

Philippines dang F-16 fighter
jets ayoktsü US-i agizükogo



Washington, Rongchii/April 2 (Agencies): Philippines dang USD billion 5.58 alang F-16 fighter jets ayoktsü atema United States-i agizükogo aser ashiba agi, iba ya strategic partner ka tashi taitba kümdakja US indang security aser foreign policy nongita yariba ka lir.

Philippines ya Southeast Asia nung yimden yimsüsüba tsütsü tamendakdak manokshidaktsütsü atema tongtibang tashi ka lir, ta shia US State Department-i Mongolbarnü sangdong ka ajanga ashiba agi, F-16 tayimtsü 20 aser iba dak sendakba hadir tem Manila dang ayoktsü agizükogo.

F-16 Jet tem alizükba ajanga Philippine Air Force, maritime domain awareness (MDA) ayongzüka agitsü tashi aser anüng ajanga teyari agütsüba mission tem tajungba kümdaktsütsü aser tsükchirtem air defence raksatsütsü asoshi tali tashi taitba kümdaktsütsü, ta State Department-i ashi.

South China Sea nung Philippine Navy aser Chinese coastguard na mapangshia mangatettep adoka aruba mapang ka nung Manila-i F-16 tem alizüktsü atema asadangdar. China-i alima temzüng özüng anema jenjang agia South China Sea ya tuluba ka parnok meyong ta shia arudar aser iba ajanga kidanger linük aika den mangatettep adoker lir.

Taoba Philippine tir Benigno Aquino yimsüsüba mapang nungi Philippines-i Washington

ket nungi F-16 alizüktsü tejangraba aliba yimjak nung lemsatapa aruogo.

Iba sülen Manila aser Washington na defence dak sendakba nung tesendaktep tali akangshiogo aser talisa tir Ferdinand Marcos Jnr lenisüba nung tesendaktep akangshiogo, shibai 2022 küm mapa agizükba sülen Beijing-i South China Sea nung jenjang agibattem anema nokdaka arudar.

Taoba hopta Philippines semdangba mapang US Secretary of Defense Pete Hegseth-i ashiba agi, China-i amokmerenba mapang Washington aser Manila na külemi nokdaktsü nüngdaker.

China-i Hombar aser Mongolbarnü Taiwan temeket nung military drills ayongzüka agiba mapang tang Philippines dang advanced fighter aircraft tem ayoktsü atema agizükba osang temai adokogo.

Philippine military chief General Romeo Brawner-i ashiba agi, China-i Taiwan makra par linük densemtsüsa akümtsü.

"Taiwan makra jenjang agitsü atema sentong yanglu tenzükan," ta General Brawner-i northern Luzon asetkong nung sepaitem dang ashi.

"Taiwan dak langka danga atalokra onok densemtsüsa akümtsü," ta pai ashi.

Joint US-Philippine military exercises ya iba ita tatemlen northern Luzon nung agitsü, koba Taiwan den anasatiba tesem lir, ta Brawner-i ashi.

Myanmar junta tekolakba regional summit ka nung adentsü

Bangkok, Rongchii/April 2 (Agencies): Myanmar junta tekolakba Min Aung Hlaing-i, Bangkok nung Hokolbarnü regional summit ka nung shilem agitsü, ta Thailand indang foreign ministry-i metetdaktsü. Iba senden nung shilem agirtem ya timba South Asian lenirtem asütsü.

2021 küm sorkar atsünga civil war ka tenzüka sülen Min Aung Hlaing-i tang Southeast Asian linük ka semdangtsü lir. Pa tang Myanmar nung lir, kong taoba Hokolbarnü 7.7 magnitude menoknok tesashi ka anoka teraksatsüba tulu adokdaktsüba den nisung aika tepsetogo. Bodhbarnü tashi nung iba menoknok lendong

nung asür nisung 2,886 junger liasü. Min Aung Hlaing nem anüolen aliba linüktemi tenokdangba balala agütsür lir aser pa Southeast Asian bloc ASEAN summit nunga shilem agitsü memelar, kechiyong Myanmar military-i yimjung asoshi bloc den nangzüktepba ama minyak.

"Pa summit anogo senden nung adentsü," ta Thai foreign ministry otongdar Nikordej Balankura-i Bodhbarnü osangbenertem den sensaksemba mapang, Myanmar junta lenir BIMSTEC summit nung tsüngtong arua shilem agitsü magitsü ta asüngdangba mapang ashi.

"Ajisüaka pa senzünpontsüba mapanglem ni kecha magizüki lir," ta paisa shisem.

Thai nunger ketdangtsür tanga kati Reuters dang ashiba agi, Min Aung Hlaing-i iba summit nung tsüngtong arua shilem agitsü.

Thailand-i iba hopta tetenzüklen, Min Aung Hlaing-i iba senden nung shilem agitsü akok ta shir liasü.

BIMSTEC summit mesüra Bay of Bengal initiative for Multi-Sectoral Technical and Economic Cooperation summit ya April 2 nungi 4 tashi agitsü. Iba telok nung Thailand, Myanmar, India, Bangladesh, Nepal, Sri Lanka aser Bhutan densema lir.

Israel-i Gaza nung tesem tuluka rakzüktsü nangzüker amaker

Jerusalem, Rongchii/April 02 (Agencies): Israel-i Gaza nung alilen amakba ulushitsü, ta Israel indang defence minister-i sangdonga Palestine nunger aliba tesem tuluka rakzüka "security" zones ta ajaba den lokteptsü nangzüker.

Israel mitkari Gaza tesem balala nung amakdang Palestine nunger 21 tepseter anogo 31 buba Gaza Strip mokdanga amtsük ayokba dokan ajunga shibanger aliba mapang Bodhbarnü iba osang ya sangdong.

Defence Minister Israel Katz-i sangdong ka nung, Israel sepaitemi kiralongrar tesem aser ki o jen mürekba mera agitsü aser alinük tulu agia State of Israel indang security areas nung bendenloktsü, ta ashi.

Pai Gaza nung aliba Palestine nunger dang rara tembangtsü asoshi Hamas samatsütsü aser Israel nunger iba tesem nung pua aliba tanüngba tem chioktsü ayongzüker.

Ajisüaka Israel-i ali kobateka rakzüktsü tebilemba aliar ajibo Katz-i mashi.

Israel mitkari Gaza telungzük nung buffer zone tulu amenoka rara metenzükdang Gaza litsü tatem nung aliba tesem ajunga agiogo aser Netzarim Corridor nung ano iba territory tiyong nungi ali tuluka bendenlok.

January ita ceasefire asoshi mulungteper aliba indang ano Hamas nem jembishidaktsütsü nükjidong nung Israel-i asendenshir amaker. Ato Kilonser Benjamin Netanyahu-i Hamas dang Israel nunger tanüngba nisung 59 Gaza nung pua aliba chiokdaktsüner aser iba melen Palestine nunger Israel nung tepuokdak aliba chioktsü aser Gaza nem humanitarian aid agütsütsü

mulunga lir, saka rara tembangtsü aser sepaitem anizüker aotsü indangbo mejembir.

Ajisüala Hamas-i taoba mapang züngzüktepa aliba ama inyaktü ashir aser teti asoshi ceasefire melen pua alir ajak chioktsü ta ashir.

Israel-i yangji telangzüba agükja Gaza nung bomb pokloktsü tenzükshi aser March 18 nungi tang tashinung tetsür aser tanur timba sür Palestine nunger 1,000 dak tema tepsetogo.

Hombarnü Israel mitkari Gaza south tsütsü Rafah nung alir ajunga jena aotsü tuyu aser Mongulbarnü north tsütsü Beit Hanoon, Beit Lahiya aser anasa aliba tesemtem nem iba osang agüja liasü.

Mirtkar temi Gaza nung 36th Division yok ta ashir aser sepaitem Bodhbarnep Strip telungi ai, ta The Times of Israel ajanga ashi.

Bodhbarnü asür nisung 21 lir aser item rongnung nisung 12 bo Israel sepaitemi southern Khan Younis nung ki ka nung tenük yoker amakdang tepsetba lir, ta Palestinian medics ajanga ashir. Anasa Rafah nung ka tepset, al-Mawasi nung aliba "safe zone" nung ka tepset aser central Nuseirat refugee camp nung ana tepset.

UN humanitarian agency, OCHA-ia social media sapang X nung civilian meyrirjang aika prangbong ola angashia jena aor, ta ashi.

Asendenshir Gaza amakba asoshi Israel linük telungzük nungia aitsür. Onok sakdang defence minister sangdong angashia aoksa, ta Israel nunger Gaza nung pua aliba kinunger temi ashi.

Alinük agitsü mechi pua alirtem bendanga agütsütsü

telemtetba agir asü, ta parnoki ashi.

Tezüngzüktep aser rara tembanga pua alirtem chioktsü asoshi inyaktü melen Israel sorkari sepai tali Gaza-i kasa tesem nung raratsü yoker. Hamas ket nung pua aliba nisung 59 chioktsü ya Israel sorkar dak keta lir, ta ashi.

Israel-i tesem ajungalen mokdang ita ka ajunger aser Gaza nung am aser cooking gas agi anüngba yong bakery ajunga shibangogo. Item rongnung World Food Programme ajanga lapokba bakery 25 densema lir.

Hamas-i Bodhbarnü sangdong ka nung, Gaza nung tepok masüngba ya ayawara jenjang tongogo ta ashi.

Ghonda shia nisung meimchir timtem tali kumdaktsüba tebilemtsü ajunga Israel-i abentsü aser Israel-i March 2 nungi tesem ajungalen mokdang tenzüker chiyongtsü, tzü, totzü mesüra mozü tem Strip telungi maiter, ta Hamas-i ashi.

UN-ia Gaza Strip amakba anena ceasefire dangi meyiptsü ayongzükogo. Gaza nung chiyongtsü peria lir ta Israel-i ashiba ya temenünütsü mapa lir, ta UN odongtar Stephane Dujarric-i ashi.

"Humanitarian route ajanga aruba chiyongtsü tem tatemleni arur... WFP-i asayamenütsü atema bakery tem shibangba masü," ta Dujarric-i ashi.

"Ceasefire mapang humanitarian aid nungboka aiba asenoki nguogo. Shishilempadak tesem takum dangi aruba nguogo. Osettsüset nung jenjang ajemba nguogo. Pua alir chiokba nguogo. Palestine nunger pua alirtem chiokba nguogo. Asenok iba mapang dangi meyiptsü nüngdaker," ta Dujarric-i ashi.

State-level volleyball referee course-cum-exam tenzükogo



Kohima, Rongchii/April 02 (TYO): Nagaland Volleyball Association (NVA) tawabangba kübok Kohima District Volleyball Association (KDVA)-i ayongzüka State-Level Volleyball Referee Course-cum-exam 2025 Mongolbarnü Multipurpose Hall, Tsiesema nung tenzükogo.

Referee course atema

shisalen sayurtemji Ramesh Babu Vidyarthi, National Referee, Volleyball Federation of India aser Dr. Harish Kumar Tiwari, FIVB Level-2 Coach Deputy Director of Sports, Nagaland University, Lumami na liasü.

Sentong nung NVA vice president Tseibou Khusoh-i o jembia liasü.

KDVA general secretary

Khrietuo Angami lenisüba nung iba sentong agi aser KDVA tir Visasielie Suhu-i lokti pela agizükba o jembia liasü.

Kohima, Dimapur, Niuland, Chumoukedima, Phek, Mon aser Shamator district nungi ajak senteper nisung 4-i iba sentong nung shilem agidar.

State-Level Volleyball Referee Course ya April 5 nü tashi agitsü.

Celtic goalkeeper Schmeichel hopta 6 masayatettsü



Rongchii/April 2, 2025 (Agencies): Linük tenüng nungi asayaba mapang yiruba sülen Kasper Schmeichel hopta pongu nungi trok tashi masayatettsü aser iba mapang Celtic pur asaya tenet nung shilem magitettsü, ta manager Brendan Rodgers-i metetdaksüogo.

Arishi küm 38 tain asayar shibai tang asaya aliba season nung club tenüng nungi 46 nem asayaogo, pa taoba ita Denmark pur Nations League quarter-final tanabuba leg nung Portugal makokba asaya nung yirua liasü.

Denmark captain, shiba

linük tenüng nungi 81 ben asayar lir, pa Portugal goal 5-2 agi makokba asaya nung shilem agi. Iba asaya makokba sülen Portugal team 5-3 aggregate nung semifinal-i iogo.

Hopta pongu mesüra trok masayatettsü aliba idang asüngdangba mapang Rodgers-i Celtic TV dang ashiba agi, "anogoshia pa asadanga alitsü, saka onok nem mapang agütsüabajibo iba mapang tsüngda asütsü.

"Kasper-i pa taneptsü angutsü atema papikajibo magitsü ta bilemer, saka pa tangsa tangbo masayatettsü," ta paisa shisem.

Schmeichel masayatetba mapang Honibarnü Scottish Premiership nung Heart of Midlothian goal 3-0 agi akokba asaya nung Viljami Sinisalo goal keeper mena liasü. Arishi küm 23 tain asayar ya Honibarnü densema Celtic nungi anaben asayaogo.

Rodgers'-i aniba team ya League nung Deobarnü St Johnstone den asayatsü aser iba sülen April 12 nü Kilmarnock den asayatsü. Parnok maneni April 20 nü Hampden Park nung Saints den Scottish Cup semifinal asayatsü.

Iba sülen defending champions team ya ano Premiership nung top six nung aliba team tem den asaya pongu asayatsü aser Aberdeen mesüra Hearts den Scottish Cup final asayatsü akok.

Schmeichel ya May ita 14 nü asayatsü aliba asaya nungi tenzüka asayatsü akok mesüra pa May 17-18 nungi tenzüka asayatsü akok.

Scottish Cup final May 24 nü asayatsü lir.

All-rounder tem rongnung Hardik maneni temaba jenjang nung lir

Rongchii/April 2, 2025 (Agencies): International Cricket Council (ICC)-i tebur T20 bowling rankings sayaogo, kong India nunger bowler Varun Chakravarthy jenjang ka asepzüka lua tang tasembuba nung lir.

Chakravarthy-i junga asayaka pa temaba jenjang nung aliba New Zealand nunger Jacob Duffy aser West Indies' nunger bowler Akeal Hosein na sülen tasembuba jenjang nung lir.

Bowlers' rankings top 10 nung India nunger Leg-spinner Ravi Bishnoi aser left-arm pacer Arshdeep Singh nata



tenet aser terbuba nung lir aser Axar Patel 13buba nung lir.

Batting rankings nung India nunger lanur asayar Abhishek Sharma Australia nunger asayar Travis Head sülen tanabuba jenjang nung lir.

Batter tem rongnung England nunger asayar Phil Salt tasembuba aser India nungersa Tilak Varma aser Suryakumar Yadav na pezübuba aser pongububa nung lir.

Kasa mapang nung India nunger all-rounder Hardik Pandya-i rating points 252 ngua pa all-rounders' rankings nung maneni temaba jenjang nung lir.

Pa sülen Nepal nunger asayar Dipendra Singh Airee aser Australia nunger Marcus Stoinis na lir.

ICC rankings ya asayatem T20 international asaya aser asayamungtem nung asayaba dak ajemdaker agütsü.

Samson nem wicket keeper amentsü temelaba agütsüogo



Mumbai, Rongchii/Arpil 2 (Agencies): India T20 team Samson wicket keeper amentsü atema Board of Control for Cricket in India's (BCCI) Centre of Excellence (CoE)-i temelaba agütsüogo.

Pa nem iba temelaba agütsüba sülen pai maneni Rajasthan Royals captain mapa bentettsü, koba asaya asem tashi Parag-i bener liasü.

Rajasthan Royals captain, shiba teka tachichilen tetuyuba temeyong yirua surgery agitsüsa aküm, pa wicket keeper aser fielding amentsü atema CoE indang medical team nungi temelaba agitsü asoshi iba hopta tetenzüklen Guwahati nungi Bengaluru-i oa liasü.

"Hau pai NCA nung tatembangbuba fitness tests ajangetetogo," ta BCCI nung source kati TOI dang ashi.

Temelaba anguba tetezü Samson lenisüba nung Rajasthan Royals pur April 5 nü

Mullanpur nung Punjab Kings den asayatsü.

Samson nem mezüngbo IPL-2025 nung mezüngbuba asaya asem nung batting dang amentsü temelaba agüja liasü. Pa wicket keeper aser fielding amentsü temelaba magütsü. Iba sülen Rajasthan Royals-i pa Impact Player ama asayadaksütsü atema telemtetba agi aser allrounder Riyan Parag nem captain mapa agüja liasü.

Taküm IPL nung Samson-i asaya asem nung run 66 (vs SRH), 13 (vs KKR), aser 20 (vs CSK) yanglur lir. Pa Impact Player ka ama batting dang mena liasü. Pa masayaba mapang Dhruv Jurel wicket keeper liasü.

Royals puri taküm IPL junga metenzükleti parnoki mezüngbuba asaya ana makok aser iba sülen Deobar aonung Guwahati nung tasembuba asaya Chennai Super Kings den asayababo kokogo.

Dilong Ward Final asayatsü maongka ngutetogo



6th Mokokchung Inter-Ward Football Tournament mezüngbuba Semi Final asaya Mongsenbai Ward aser Dilong Ward tsüngda asayadang tangokba noksa angur.

Mokokchung, Rongchii/April 02 (TYO): Mongsenbai Ward aser Dilong Ward tanü Imkongmeren Sports Complex nung 6th Mokokchung Inter-Ward Football Tournament mezüngbuba Semi Final asayaogo.

Iba asaya tenzüker minute 14 buba nung Dilong telok nungi jersey-10 Takotuba-i goal-1 yok, iba sülen mapang tatsüka asayar minute 36 buba nung Mongsenbai telok nungi jersey no-10 Imshimong-i

goal-1 yokteta telok ana kasasa aküm. Atakzükba mapang tatem tashi nung telok anaprongi akoktsü merangtepa asaya saka telok katia goal magütsütet nung Tie-Breaker metsütep aser iba nung Dilong-i 5 yok aser Mongsenbai-i 4 yoktet nung Dilong Final asayatsü maongka ngutetogo.

03-04-2025 Semi Final

Fixture

2:00 PM - Sangtemla Ward Vs Kumlong Ward

BILEMDANGANG

"Nü taküm na asoshi liang."